

आकाशवाणी जयपुर—अजमेर प्रादेशिक समाचार

- राज्यपाल कलराज मिश्र प्रदेश ने समृद्ध, सम्पन्न अर भ्रष्टाचार मुक्त बणावण सारू सगळा ऊं मिल र कोशिश करण री अपील कीनी।
- देश मांय कौशल भारत योजना रा तैत एक करोड़ 46 लाख ऊं बत्ता लोगां ने सिखावण दीरीजी।
- विधानसभा मांय हनुमानगढ ज़िला री भादरा नगरपालिका अध्यक्ष रो उपचुनाव करावण रा मुद्दा माथे हंगामो व्हयो।
- प्रदेश मांय केई ठोड़ां बिरखा— आवता 4—5 दिन कोटा अर उदयपुर संभाग मांय तेज़ बारिश रा आसार।

000

राज्यपाल कलराज मिश्र लोक सेवकां ऊं जनता ऊं जुड़्या काम ईमानदारी ऊं करावण बाबत कह्यो है। वे भ्रष्टाचार निरोधक ब्यूरो रा स्थापना दिवस रे मौके आज जयपुर मांय राख्यी ज्या कार्यक्रम मांय बोल रह्या हा। वे प्रदेश ने समृद्ध, संपन्न अर भ्रष्टाचार मुक्त बणावण सारू सगळां ऊं मिल र कोशिश करण बाबत कह्यो। राज्यपाल कह्यो के भ्रष्टाचार रोकण सारू ऐड़ी व्यवस्था करण री जरूरत है कि एक दफा कोई पकड़्यो जावे तो वो कानूनन किण ई लेवल माथे नी छूटे। कार्यक्रम मांय मुख्य सचिव सुधाश पंत कह्यो के अहलकारां ने तुरत फैसला कर र लागू करणा चाहिजे। वे कह्यो के इण ऊं भ्रष्टाचार ने काबू करण मांय मदद मिलेला। ई मौके पुलिस महानिदेशक उत्कल

रंजन साहू कह्यो के करीब-करीब सगळ जिला मुख्यालयां माथे एसीबी असरदार तरीका ऊं काम कर रही है।

00000

कौशल भारत योजना रा तैत देश मांय हाल तांई एक करोड 46 लाख ऊं बत्ता लोगां ने सिखावण दीरीजी है। कौशल विकास अर उद्यमिता मंत्री जयंत चौधरी आज नई दिल्ली मांय विश्व युवा कौशल दिवस रा सिलसिला मांय राख्यी ज्या कार्यक्रम मांय आ जाणकारी दीनी। वे कह्यो के ई साल विश्व युवा कौशल दिवस रो मुद्दो **शांति और विकास** है। ई मौके चौधरी कौशल भारत योजना रा तैत सिखावण लेवण वाळा नौजवानां सागे बातचीत कीनी।

0000

प्रदेश मांय चलाया जा रह्या पौधा रोपण रा अभियान रा तहत केई ठौड़ां पौधा रोपी ज्या। डूंगरपुर मांय जिला कलेक्टर अंकित कुमार सिंह अहलकारां सागे कलेक्ट्री परिसर मांय पौधा रोप र पर्यावरण ने बचावण रो संदेश दीनो। सलूमबर रा जिला कलेक्टर जसमीत सिंह संधू राजकीय उच्च माध्यमिक विद्यालय करावली मांय पौधा रोप र पौधा रोपण रा महाअभियान री सरूआत कीनी। अभियान रा तहत जिला री न्यारी-न्यारी स्कूलां, आंगनबाड़ी केन्द्रां अर आयुष आरोग्य मन्दिरां मांय पौधा रोप्या जावेला। केकड़ी मांय लड़कियां री सरकारी सीनियर सैकेण्डरी स्कूल मांय आज "वृक्ष लगाओ जीवन बचाओ" कार्यक्रम रा तैत पौधा रोपी ज्या अर छात्रावां ने मुफ्त पौधा बांटी ज्या। केकड़ी री जिला कलेक्टर श्वेता चौहान आज न्यारी-न्यारी ग्राम पंचायतां मांय पौधा रोपण रा काम रो जायजो लीनो।

बूंदी मांय एक पेड़ देश के नाम अभियान रा तैत पौधा रोपी ज्या। बाड़मेर जिला मांय विद्यार्थी पोस्टर बणा र पौधा रोपण रो संदेश दीनो। चित्तौड़गढ़ जिला मांय हरित चित्तौड़' अभियान रा तहत सरकारी स्कूलां, दफतरां अर पार्कां मांय अर सड़कां री कोर कने मोकळा पौधा रोप्या जा रह्या है। अभियान मांय जिला प्रशासन, वन विभाग, एनजीओ, स्कूल – कॉलेज रा विद्यार्थी, राजीविका ऊं जुड़ी महिलावां अर वठे रा रहवासी पूरा उमाव ऊं सिरकत कर रह्या है। एक पेड़ मां के नाम अभियान रा तहत भाटोलाव अर हिंगोनिया ग्राम पंचायतां मांय डोढ़ हजार ऊं बत्ता पौधा रोपी ज्या।

00000

राजस्थान लोक सेवा आयोग री ओर ऊं राजस्थान राज्य और अधीनस्थ सेवाएं संयुक्त प्रतियोगी आर.ए.एस. मुख्य परीक्षा-2023 20 अर 21 जुलाई ने दो पारियां मांय संवारे 9 ऊं दोपहरां 12 बज्यां ताई अर दोपहरां पाछे अढ़ाई ऊं सिंज्या साढे पांच बज्यां ताई ली जावेला। परीक्षा सारू अजमेर, जयपुर, जोधपुर, कोटा अर उदयपुर मांय परीक्षा केन्द्र बणायी ज्या है। आयोग रा सचिव बतायो के उम्मीदवार इम्तेहान सारू आवंटित ज़िला री जाणकारी एसएसओ पोर्टल ऊं ले सके है। प्रवेश-पत्र आयोग री वेबसाइट अर एसएसओ पोर्टल माथे 17 जुलाई ने जारी कर्या जावेला।

000

हनुमानगढ़ जिला री भादरा नगरपालिका मांय **अध्यक्ष ओहदा सारू** उप चुनाव नी करावण रा मामला माथे कांग्रेस रा सदस्य आज विधानसभा मांय खूब हंगामो कीनो। शून्यकाल रे दौरान नोहर ऊं कांग्रेस रा विधायक अमित चाचाण स्थगन प्रस्ताव रे ज़रिये ओ मामलो उठाता थकां कह्यो के 8 जुलाई ने नगर पालिका मांय उप चुनाव रो ऐलाण कर दियो ज्यो हो। वे कह्यो के मोकळा पार्षद उप चुनाव सारू पूग ग्या हा, पण चुनाव अधिकारी औचक ई छुट्टी ले लीनी। वे कह्यो के ई पाछे हाल ई उप चुनाव री तारीख रो ऐलाण नी करी ज्यो है। ई पाछे चाचाण सागे कांग्रेस रा विधायक वेल मांय आ र नारा लगावण लाग्या। विधानसभा भवन रे बाहर खबरनवीसा सागे बातचीत करता थकां संसदीय कार्य मंत्री जोगाराम पटेल कह्यो के चुनाव अधिकारी री तबियत खराब व्हेवण रे कारण वे छुट्टी ले लीनी ही। पटेल कह्यो के इण रो सरकार ऊं कोई लेणो-देणो नी है अर विपख रा सदस्य सदन मांय बिना बात ई हंगामो कीनो।

00000

गृह राज्यमंत्री जवाहर सिंह बेढ़म कह्यो है के राज्य सरकार प्रदेश रा पूरा बजट मांय करी ज्या प्रस्ताव लागू करण ऊं जुड़्या ज़रूरी जतन सरु कर दीना है। वे आज दौसा मांय खबरनवीसां सागे बातचीत करता थकां कह्यो के भजनलाल सरकार एक सोच सागे काम कर रही है।

.....

राज्य रा बजट मांय करी ज्या न्यारा-न्यारा ऐलाण रे मुजब जनता ने फायदो दिरावण रा बारा मांय जतन करण माथे विचार सारू

सवाईमाधोपुर रा ज़िला प्रभारी सचिव संदीप वर्मा आज अहलकारां सागे मीटिंग कीनी। वे अहलकारां ने तालमेल सागे काम करण रा हुकम दीना।

000

गृह राज्य मंत्री जवाहर सिंह बेढम गिराज जी मांय भरण वाळा मुड़िया पूर्णिमा मेळा री तैयारी रो जायजो लीनो। वे मेळा मांय आवण वाळा जातरूआं सारू जरूरी व्यवस्थावां करण रा हुकम दीना। वे परिक्रमा रा गेला रो अहलकारां सागे पैदल दौरा कीनो।

00000

भारतीय जनता पार्टी रा प्रदेश अध्यक्ष सी.पी. जोशी कह्यो है के पार्टी री प्रदेश कार्यसमिति री मीटिंग पाछे अब ज़िला अर मंडल समिति री बैठकां राख्खी जावेला, ज्यां मांय आगली कार्ययोजना अर विधानसभा उप चुनाव रा बारा मांय रणनीति माथे चर्चा करी जावेला। वे आज नागौर जिला मांय खबरनवीसां सागे बातचीत कर रह्या हा।

000

कोटा जिला मांय न्यारा—न्यारा हादसां मांय तीन जणा री मौत व्हे ग्यी। इटावा मांय गैंता रोड माथे करंट लाग जावण ऊं जयपुर विद्युत वितरण निगम लिमिटेड रा एक टेक्नीशियन री मौत व्हे ग्यी। बूंदी रोड माथे तेज रफ्तार ऊं जा रह्या डम्पर री फेंट मांय आ जावण ऊं मोटरसाइकिल सवार एक जणां री मौके ई मौत व्हे ग्यी जदके दो जणा घणा ज़ख्मी व्हे ग्या। कोटा कापरेन गेला माथे एक बस री फेंट मांय आ जावण ऊं मोटरसाइकिल सवार एक जणा री मौत व्हे ग्यी।

0000

प्रदेश रा केई हलका मांय चोखो मेह बरस रह्यो है। भीलवाड़ा मांय दोपहरां पाछे व्ही तेज बिरखा ऊं गर्मी अर उमस ऊं साता मिली। सांचौर मांय ई जोरदार बिरखा ऊं केई ठोड़ां पाणी भर ग्यो। बालोतरा जिला री बायतू तहसील मांय ई मेह बरस्यो। बीकानेर जिला रा देशनोक मांय करीब एक घंटा ताई बिरखा व्ही। अजमेर, कोटा, बूंदी, टोंक, बारां, जयपुर, नागौर, सीकर, झुंझुनू, चुरू, भरतपुर, करौली, धौलपुर, दौसा, जोधपुर, पाली, सवाईमाधोपुर, हनुमानगढ अर श्रीगंगानगर मांय ई कई ठोड़ां बिरखा रा समाचार है। मौसम विभाग रे मुजब बिरखा री ट्रफ

लाइन आज जैसलमेर, कोटा व्हेती निकळ रही है। इण रा असर ऊं राज्य रा ऊगणी हलका मांय केई ठोड़ां आवता 4-5 दिन चौमासा री बिरखा व्हेवण अर कोटा अर उदयपुर संभाग मांय कठे-कठे भारी बारिश व्हेवण रा आसार है। 17 अर 18 जुलाई ने बिरखा मांय बधोतरी व्हेवण अर कोटा, उदयपुर अर अजमेर संभाग मांय कठे-कठे घणी जोरदार बिरखा व्हेवण रा आसार है। 17 ऊं 19 जुलाई बीचे जोधपुर अर बीकानेर संभाग मांय केई ठोड़ां बिरखा मांय बधोतरी अर 18 जुलाई ने कठे-कठे तेज बिरखा व्हेवण री संभावना है।

0000